

Dómsmálaráðuneytið

Sölvhólgötu 7

101 Reykjavík

Hagsmunasamtök
Heimilanna



20. febrúar 2019

Efni: Umsögn Hagsmunasamtaka heimilanna um mál nr. S-40/2019 í samráðsgátt stjórnvalda

Drög að frumvarpi til laga um breytingu á lögum um meðferð einkamála, lögum um meðferð sakamála, lögum um dómstóla o.fl.

Tilgangur frumvarps þessa er að gera ákveðnar lagfæringar og úrbætur á því regluverki sem varð til á sviði réttarfars í tengslum við tilkomu millidómstigs. Hagsmunasamtök heimilanna vilja af þessu tilefni benda á tiltekna vankanta sem reynsla félagsmanna af hinu nýja regluverki hefur leitt í ljós, einkum í tengslum við málskot frá Landsrétti til Hæstaréttar.

Ólíkt því sem áður var þarf núna í öllum tilvikum að sækja um leyfi til áfrýjunar eða kærur til Hæstaréttar. Þrátt fyrir að óvíst sé hvort slíkt leyfi fáið þarf engu að síður að greiða sérstakt gjald þegar umsókn um leyfi er lögð fram og fáið leyfið þarf aftur að greiða gjald fyrir útgáfu áfrýjunarstefnu og enn aftur fyrir þingfestingu máls. Þar að auki hafa þessi gjöld nýlega verið hækkuð umtalsvert, þannig að þau nema nú samanlagt að lágmarki 129.000 kr. vegna áfrýjunar. Með frumvarpi þessu er lagt til að í kærumálum verði aðeins greitt gjald fyrir umsókn um kæruleyfi en ekki viðbótargjald ef sú umsókn er samþykkt. Samtökin leggja til að það sama skuli gilda um áfrýjun, þannig að útgáfa áfrýjunarstefnu verði innifalin í gjaldi fyrir umsókn um áfrýjunarleyfi.

Einnig vilja samtökin benda á að kærufrestur úrskurðar Landsréttar er nú mjög stuttur eða einungis tvær vikur, auk þess sem krafa er gerð um afhendingu kærumálgagna til Hæstaréttar í sex eintökum, innan viku frá því að sótt er um kæruleyfi. Á þeim tímapunkti liggur ekki fyrir hvort kæruleyfi fáið og sé umsókn synjað verða málgögnin með öllu óþörf, sem felur ekki aðeins í sér soun á hráefni á borð við pappír og blek heldur einnig að sú vinna sem er lögð í að gera ágríp málgagna verður til einskis. Því er öðruvísi farið í áfrýjunarmálum en þá þarf ekki að afhenda málgögn fyrr en eftir að niðurstaða liggur fyrir um hvort áfrýjunarleyfi verði veitt eða ekki. Samtökin leggja því til að þetta verði einnig samræmt, þannig ekki þurfi að afhenda kærumálgögn fyrr en afstaða hefur verið tekin til umsóknar um kæruleyfi. Auk þess er ein vika er afar knappur tími til þess, sérstaklega í umfangsmiklum málum þar sem málgögn geta talið þúsundir blaðsíðna. Samtökin leggja því jafnframt til að sá frestur verði rýmkaður í að minnsta kosti tvær vikur.

- 0 -

Virðingarfyllst, f.h. Hagsmunasamtaka heimilanna,

Ásthildur Lóa Þórsdóttir, formadur@heimilin.is

Guðmundur Ásgeirsson, erindreki@heimilin.is